

قصة بداية العالم  
سفر التكوين  
الفصل واحد إلى الفصل خمسة

# سفر التكوين

1

## بداية العالم

<sup>1</sup>فالبداية خلق مولانا العالم. وهادي هي الطريقة اللي خلقو بيها: <sup>2</sup>فالبداية كانت لارض ماهي منتظمة ولا فيها شي، وكانت الظلمة امغطية الماء، وروح مولانا يحوم فوكو. <sup>3</sup>وكمال مولانا: يخلق النور. واخلق النور. <sup>4</sup>وخرص مولانا النور وشاف النور زين. وافصل مولانا النور عن الظلمة. <sup>5</sup>وسما مولانا النور انهار، وسما الظلمة ليل. وعاد ليل وعاد امع الصباح. وكان ذاك هو اليوم لأول.

<sup>6</sup>وكمال مولانا: تخلق قبة امبين المياه اياك اتقسم المياه شور قسمين. <sup>7</sup>وخلق مولانا قبة وافصل المياه اللي تحت القبة عن المياه اللي فوكها. واخلق هاذا. <sup>8</sup>وسما مولانا القبة السما. وعاد ليل وعاد امع الصباح. وكان ذا اليوم الثاني.

<sup>9</sup>وكمال مولانا: يجتمعو المياه اللي تحت السما كاملين فابليدة وحدة اياك تظهر التراب. واخلق ذا. <sup>10</sup>وسما مولانا هادي التراب لارض، وسما بل امنين اجتمعو المياه لبحور. وخرص مولانا وشاف ذاك كامل زين. <sup>11</sup>وكمال مولانا: تعطي لارض النباتات اللي فيهم لبذور، ويخلق اصدر رافد الثمار اللي فيهم لبذور بكل أنواعهم اعلى لارض. واخلق ذا. <sup>12</sup>ووظخت لارض النباتات اللي فيهم لبذور بكل أنواعهم، واعطت املي اصدر رافد اثمار فيهم لبذور من نوعهم. وخرص مولانا وشاف ذا كامل زين. <sup>13</sup>وعاد ليل وعاد امع الصباح. وكان ذا اليوم الثالث.

<sup>14</sup>وكمال مولانا: يخلقو لأنوار فقبة السما اياك يميزو النهار عن الليل ويعودو علامات يحددو لأيام والسنين ولعياد. <sup>15</sup>ويخلقو أنوار فقبة السما اياك يظو اعلى لارض. واخلق ذا.

16 وخلق مولانا لأنوار لكبار لأثنين : خلق النور لأول لكبير اياك يعود فانهار، وخلق النور الثاني الصغير اياك يعود فاليل، وخلق مولانا النجوم املي. 17 ودار مولانا هادو لأنوار فقبة السما اياك ايظو اعلى لارض، 18 واجعلهم مولانا هوما المسؤولين عن انهار وليل وهوما اللي يميزو النور من الظلمة. وخرص مولانا وشاف ذا كامل زين. 19 وعاد ليل وعاد امع الصباح. وكان ذا اليوم الرابع.

20 وعاكب ذا كمال مولانا: تمتلا المياه بياسر من المخلوقات الحيين، واتعود فم اطيور اتطير امبين لارض والسما. 21 وخلق مولانا وحوش لبحور لكبار ، وكيف ما خلق المخلوقات الحيين كاملين اللي املان منهم الماء، خلقهم من كل نوع. وخلق املي كل اطيور بريشاتو من كل نوع. وخرص مولانا هاذا وشافو زين. 22 ودار مولانا فيهم البركة وكال: اثمرو واكثارو ويمتلاو مياه لبحور بالمخلوقات، ويكثارو الطيور اعلى لارض. 23 وعاد ليل وعاد امع الصباح. وكان ذا اليوم الخامس.

24 وكال مولانا: تعطي لارض مخلوقات حيين من كل نوع : من حيوان يُربّا وزواحف وحيوانات لخلا من كل نوع. واخلق ذا. 25 وخلق مولانا الحيوانات لخلا من كل نوع، والحيوان اللي يُربّا من كل نوع، وكل حيوان يزحف اعلى التراب من كل نوع. وخرص مولانا وشاف ذا زين. 26 وعاكب ذاك كمال مولانا: انخلكو لإنسان اعلى شي من صيفاتنا، وسلط مولانا لإنسان اعلى حوت لبحر واطيور السما والحيوان اللي يُربّا وحيوان لخلا اعلى التراب واعلى كل حيوان يزحف اعلى التراب .

27 وخلق مولانا لإنسان اعلى شي من صيفاتو، اعلى شي من صيفاتو خلقهم راجل وامرة. 28 ودار مولانا فيهم البركة وكال: اثمرو واكثارو وعودو ياسرين وسيطرو اعلى لارض، واتسلطو اعلى حوت لبحر واطيور السما وكل شي يتحرك اعلى لارض. 29 وكال مولانا: اراني اعطيتكم كل اصدر اعلى وجه لارض رافد ابذور. اعطيتكم كل صدراية رافدة لكم ثمار اياك توكلوهم. 30 يغير لحيوانات لارض واطيور السما كاملين وكل الحيوانات الصغيرة اللي تزحف وكل مخلوق فيه روح، اتعود النباتات اطعامها. واخلق ذا. 31 وخرص مولانا هاذا وشافو زين حته. وعاد ليل

وعاد امع الصباح. وكان ذا اليوم السات.

## بداية العالم

### اخلاكية العالم- القصة الثانية

<sup>1</sup>وبهاذي الطريقة اوفوا السماوات ولارض وذا كامل اللي فيهم. <sup>2</sup> وعاكب يلين اوفانا من شغلتنو كامل، استراح فالיום السابع. <sup>3</sup> وبارك مولانا اليوم السابع وكمال اعلنو مخلصلو، بيهلي اوفافيه من خلق العالم. <sup>4</sup> هادي هي قصة السماوات ولارض وقت اخلاكتهم: اليوم اللي خلق الله تعالى لارض والسماوات <sup>5</sup> ما كانت أي اربعة خالكة اعلى لارض، ولا كان املي أي اصدر فات انبت، بيهلي الله تعالى مافات فهذا الوقت مشا اسحاب اعلى لارض، ولا كان فات اخلك أي آرچاج يحرث التراب. <sup>6</sup> يغير كان يوظ من لارض فهذا الوقت عين من الما تسكي التراب. <sup>7</sup> وعاكب ذاك خلق الله تعالى الراجل من التراب وانفخ فاخنافرو الحياة وعاد الراجل نفس حية. <sup>8</sup> وعاكب ذاك اغرس الله تعالى اصدر فابليدة زينة فعدن فالشرق وفم عاد عايش الراجل اللي خلق. <sup>9</sup> ونبت الله تعالى من لارض كل نوع من الصدر الزين و صالح للوكيل. وكانت فوسط هادي لبليدة الزينة صدراية تعطي الحياة وصدراية اخرا تعطي معرفة الصالح والطالح. <sup>10</sup> وكان فم نهر يمشي فهاذي لبليدة الزينة اللي فعدن اياك يسكيها، وكان هاذا النهر يتفرعو منو <sup>4</sup> فروع. <sup>11</sup> أسم لأول هو فيشون وهو اللي يوظ احذا ارض الحويلة كاملة بل امنين فيه الذهب. <sup>12</sup> والذهب اللي فم من نوعية زينة، وفم املي ازين لبخور واحجار العقيق. <sup>13</sup> وأسم الثاني هو جيحون وهو اللي يوظ احذا ارض كوش كاملة. <sup>14</sup> وأسم الثالث هو دجلة ويوظ شرق آشور. والرابع أسمو الفرات.

<sup>15</sup> واطبظ الله تعالى الراجل ودارو فهاذي لبليدة الزينة اللي فعدن اياك يحرثها ويرعاها. <sup>16</sup> ووصا الله تعالى الراجل وكمالو: اتكد توكل اللي تبغي من الصدر ذي لبليدة اللي فعدن. <sup>17</sup> يغير ذيك الصدراية اللي تعطي المعرفة

امبين الصالح والطالح، لا توكل منها، بيهلي الوقت اللي توكل منها لاهي  
اتموت .

<sup>18</sup> وڤال الله تعالى: ماهو زين بيڤا الراجل وحدو، ولذاك لاهي انخلڤو  
مُعِين اياك يشارك حياتو امعاه. <sup>19</sup> وخلق الله تعالى من التراب كل حيوان  
فلحريثة وكل اطيور السما. وعاڤب ذاك جابهم كاملين للراجل اياك يشوف  
شلاهي يسمي كل واحد منهم. وكل مرة يسمي واحد من المخلوقات يعود ذاك  
أسمو. <sup>20</sup> وسما الراجل الحيوانات كاملين اللي يُربّاو واطيور السما كاملين  
وحيوانات لخلا كاملين ، يغير ما اجبر امبينهم واحد يعاونو ويشابهلو. <sup>21</sup> و  
رڤد الله تعالى الراجل ارڤاد امتين، وفوقت ارڤادو، اڤبظ الله تعالى ظلعة من  
اظلوعو وغطا بلها بالجل . <sup>22</sup> وعاڤب ذاك خلق الله تعالى من الظلعة اللي  
اڤبظها من الراجل امرة وڤدمهالو. <sup>23</sup> وڤال الراجل: ظرك ، هاذي اعظم من  
اعظامي ولحمة من لحمي، ولاهي انسميها امرة بيهلي انڤبظت من امرئ.  
<sup>24</sup> ولذا السبب يخلي الراجل بوه وأمو ويلتصك بأعيالو، ويعودو عايلة وحدة.  
<sup>25</sup> وكانو الراجل وأعيالو كلهم عريان، يغير ما كانو يستحاو.

## بداية العالم

### الذنب لأول

<sup>1</sup> وكان الحنش هو أمكر حيوانات لخلا اللي خلقك الله تعالى. وكمال للمرة:  
 حكاك كالكم الله تعالى : لا توكلو من أي صدراية فهادي لبليدة الزينة ؟  
<sup>2</sup> وكمال للمرة للحنش: ابدي انكبدو نوكلو من احدج الصدر كامل اللي فهادي  
 لبليدة، <sup>3</sup> يغير الصدراية اللي فوسط هادي لبليدة الزينة، كط كالنا الله تعالى:  
 لا توكلو منها ولا اتمسوها اياك ما اتموتو. <sup>4</sup> وكمال الحنش للمرة: ابدي مانكم  
 لاهي اتموتو . <sup>5</sup> يغير الله تعالى يعرف اعلنكم الوقت اللي توكلو منها لاهي  
 اتعود عندكم معرفة اجديدة واتعودو كيفت الله تعالى اتميزو امبين الصالح  
 والطالح. <sup>6</sup> وشافت للمرة اعلن الصدراية زينة للوكيل وتجذب شورها العين،  
 ومرغوب فيها بسبب اللي تعطي من الحكمة لحد يوكل منها . وكبظت من  
 احدجها وكالت. ومن فم اعطت لراجلها اللي كان امعاها وكال هو املي.  
<sup>7</sup> وانفتحو عينيهم، وفطنو اعلنهم عريانين. وخيطو اورك صدراية التين  
 وصنعو لروسهم لباس يغطي عورتهم.  
<sup>8</sup> ومن فم سمعو صوت الله تعالى ماشي فهادي لبليدة الزينة وقت مشي  
 الريح، واتروقو الراجل وأعيالو من الله تعالى امبين اصدر هادي لبليدة.  
<sup>9</sup> وعيط الله تعالى للراجل وكالو: انتا امنين؟ <sup>10</sup> وكمال الراجل: اسمعت صوتك  
 فهادي لبليدة ونخلعت بيلى أنا عريان، واتروقت عنك. <sup>11</sup> وكالو الله تعالى:  
 من كالك اعلنك عريان؟ اترك كلت من الصدراية اللي انهيتك عن توكل  
 منها؟ <sup>12</sup> وكمال الراجل: للمرة اللي امعاي، اعطاتني من احدج الصدراية  
 وكلت. <sup>13</sup> وعند ذاك كمال الله تعالى للمرة: ذا اللي عدلتني شنهو؟ وكالتلو للمرة:  
 الحنش احتال اعلي وكلت من احدج ذيك الصدراية.  
<sup>14</sup> وكمال الله تعالى للحنش: بيكلي انتا عدلت ذاك، اتعود ملعون أكثر من  
 المخلوقات لخرين كاملين. وكل أيام حياتك لاهي تحبي اعلي كرشك، ولاهي

توكل التراب،<sup>15</sup> ولاهي اندير عداوة امبينك وامبين لمره وامبين نسلك  
ونسلمها. لاهي بيعج نسلها راسك وانتا لاهي اتعظو فالعركوب.  
<sup>16</sup> وكمال الله تعالى للمرة: لاهي انكثر اوجاع حملك. وبالألام لاهي تبراي  
أولادك، ولاهي تخدمى راجلك، ولاهي يسود اعليك.  
<sup>17</sup> وكمال الله تعالى للراجل: انتا اسمعت اللي اقترحت اعليك أعيالك وكلت  
من الصدراية اللي انهيتك عن توكل منها. ولذا لاهي نلعن لارض، ولانك  
لاهي اتعود توكل منها يكون بالكد والتعب كل أيام حياتك.<sup>18</sup> ولاهي اتنتبتك  
الشوك وينيتي، ولاهي توكل من اصدر لحرية.<sup>19</sup> اتحصل اطعامك باعرك  
جبهتك، يلين ترجع للتراب اللي اوخلكت منها. من التراب اوخلكت وشور  
التراب لاهي ترجع.  
<sup>20</sup> وسما آدم أعيالو حواء بيهلي لاهي اتعود أم البشر كاملين.<sup>21</sup> واصنع الله  
تعالى لباس من جل حيوان لآدم وأعيالو، ولبسولهم.  
<sup>22</sup> وكمال الله تعالى: اراعيه عاد لإنسان كيف واحد منا فالتمييز امبين  
الصالح والطالح، وظرك عاد يكديمد ايديو ويكبظ من احدج صدراية الحياة  
ويوكل منها ويعيش إلى الأبد.<sup>23</sup> وصاعو الله تعالى من لبليدة الزينة اللي  
فعدن اياك يحرث التراب اللي اوخلكت منها.<sup>24</sup> وعاكب يلين صاع لإنسان،  
دار مولانا فجيهة شرق عدن نوع من الملائكة أسمهم الكروبيم اللي كانو  
رافدين سيف من نار يزكنن اياك يحرس اطريك اللي واعدة صدراية الحياة.

## بداية العالم

### أول مرة يموت آر كاج

1 وعاشر آدم أعيالو حواء وحملت منو وخلاتلو اطفيل أسمو قابيل وكالت: ارزقني الله تعالى باطفيل. 2 وعاكب ذاك خلات خوه هابيل. وكان هابيل راعي لغنم، وقابيل كان مزارع. 3 وعاكب فترة كدم قابيل لله تعالى قربان من خيرات لارض. 4 وهابيل كدم اشبه اللي عندو من اكبر لغنم واسمنها. واكل الله تعالى قربان هابيل، 5 يغير قربان قابيل ما كبلو. وانفكع قابيل حته، و عاد وجهو امعبس. 6 وكمال الله تعالى لقابيل، اعلاش تنفكع؟ اعلاش يعبس وجهك؟ 7 يلين اتعدل شي صالح نكلو، والين اتعدل شي ما هو صالح لاهي يعود ذنبك اكريب من بابك ويدور يتحكم فيك، ولا تخليه يتحكم فيك. 8 وكمال قابيل لخوه هابيل: وهاي جاي نمشو شور الخلوات. وفالوقت اللي كانو فيه هو ما لأثنين فالخلوات، اهجم قابيل اعلى خوه هابيل وكتلو. 9 وكمال الله تعالى لقابيل: امنين خوك هابيل؟ وكمالو قابيل: ما نعرف. أنا اثري حارس لخوي؟ 10 وكمال الله تعالى: شنهو اللي عدلت؟ دم خوك يزوكيلي من التراب. 11 من ظرك لارض لعنتك وفتحت فمها لدم خوك اللي اكلتو بايدك. 12 يلين تحرت التراب ماهي لاهي تعطيك شي. وانتا لاهي اتعود واقد بلا مسكن. 13 وكمال قابيل لله تعالى: عقابي امتن من انكد نتحملو. 14 انتا اليوم صععتني من لارض اياك نختفي من حضرتك وانعود ابلا مسكن فالدنيا، وأي آر كاج يجبرني يكتلني. 15 وكمالو الله تعالى: ابدي، اللي يكتلك لاهي انعاقبو باسبع مرات عقابك. ودار الله تعالى علامة اعلى قابيل اياك ما يكتلو حد يجبرو. 16 وامشا قابيل عن محضر الله تعالى واسكن فارض نود اللي شرق عدن. 17 وعاشر قابيل أعيالو وحملت وخلاتلو اطفيل أسمو حنوك. وكان قابيل وقتها بيني مدينة، وسماها حنوك اعلى أسم ولو. 18 وحنوك اجبر إشيرو أسمو عيراد، وعيراد اجبر محويل، ومحويل اجبر متوشيل ومتوشيل اجبر

لامك. <sup>19</sup> واتعرس لامك امع مرتين: وحدة منهم أسمها عادة ولخرا أسمها  
صلّة. <sup>20</sup> وخلات عادة يابال وهو أول آرچاج اسكن فلخيام واسرح لغنم.  
<sup>21</sup> وأسم خوه يوبال وهو أول آرچاج اخبط التيدينيت والنيفارة. <sup>22</sup> وصلّة  
خلات توبال قابيل وهو أول آرچاج اصنع آلات من النحاس ولحديد، واختو  
أسمها نعمة.

<sup>23</sup> وڤال لامك لاعلياتو عادة وصلّة: يا عادة وصلّة اسمعو اكلامي يا  
اعليات لامك، عدلو اللي انڤولكم: أنا اكلت راجل اجرحني وشاب اخبطني.  
<sup>24</sup> وبالتالي يلين يعود يخلص لقابيل 7 مرات لاهي يعود يخلص للامك 77  
مرة.

<sup>25</sup> وعاشر آدم حواء مرة اخرا وخلاتلو اطفيل وسماتو شيث وڤالت:  
ارزقني مولانا باطفيل اوخر بل هابيل اللي كتلو قابيل. <sup>26</sup> واجبر شيث اطفيل  
وسماه أنوش. وفذاك الوقت ابداءو الناس يعبدو الله تعالى.

## بداية العالم

### سلسلة نسب النبي آدم يلين النبي نوح

<sup>1</sup>هاذا سجل مواليد آدم: اليوم اللي خلقك مولانا فيه لإنسان، خلقو اعلى شي من صيفاتو. <sup>2</sup>وخلقهم راجل وامرة وباركهم وسماهم لإنسان. <sup>3</sup>والين عاد عند النبي آدم 130 سنة، اجبر ول يشابهلو اعلى صيفاتو وسماه شيث. <sup>4</sup>وعاش آدم بعد اخلاكة شيث 800 سنة، واجبر فيها اولاد اخرين وامنات. <sup>5</sup>وكان آدم عندو 930 يلين اتوفا.

<sup>6</sup>والين عاد عند شيث 105 سنوات اجبر أنوش. <sup>7</sup>وعاش شيث بعد ذاك 807 سنوات، واجبر فيها اولاد اخرين وامنات. <sup>8</sup>وكان عند شيث 912 سنة وقت وفاتو.

<sup>9</sup>والين عاد عند أنوش 90 سنة اجبر قينان. <sup>10</sup>وعاش أنوش عاكب ذاك 815 سنة، واجبر فيها اولاد اخرين وامنات. <sup>11</sup>وكان عند أنوش 905 سنوات وقت وفاتو.

<sup>12</sup>والين عاد عند قينان 70 سنة اجبر مهلائيل. <sup>13</sup>وعاش قينان بعد ذاك 840 سنة، واجبر فيها اولاد اخرين وامنات. <sup>14</sup>وكان عند قينان 910 سنوات وقت موتو.

<sup>15</sup>والين عاد عند مهلائيل 65 سنة اجبر يارد. <sup>16</sup>وعاش مهلائيل عاكب ذاك 830 سنة، واجبر فيها اولاد اخرين وامنات. <sup>17</sup>وكان عند مهلائيل 895 سنة وقت وفاتو.

<sup>18</sup>والين عاد عند يارد 162 سنة اجبر النبي إدريس. <sup>19</sup>وعاش يارد عاكب ذاك 800 سنة، واجبر فيها اولاد اخرين وامنات. <sup>20</sup>وكان عند يارد 962 سنة وقت وفاتو.

<sup>21</sup>والين عاد عند النبي إدريس 65 سنة اجبر متوشالح. <sup>22</sup>وعاش النبي إدريس عاكب ذاك 300 سنة. كان متقي فيها مولانا، واجبر فيها اولاد

وامنات. <sup>23</sup> وكان عند النبي إدريس فهذا الوقت 365 سنة. <sup>24</sup> وكان النبي إدريس متقي فيها مولانا. وعاكب ذلك اختفا النبي إدريس بيهلي رفعو مولانا شورو. <sup>25</sup> وإلين عاد عند متوشالح 187 سنة اجبر لامك. <sup>26</sup> وعاش متوشالح عاكب ذلك 782 سنة، واجبر فيها أولاد آخرين وامنات. <sup>27</sup> وكان عند متوشالح 969 سنة وقت موتو. <sup>28</sup> وإلين عاد عند لامك 182 سنة اجبر اطفيل، <sup>29</sup> وسماه نوح وكمال: هاذا الول يخفف عنا تعبنا والمشقات اللي انعانوها فلارض اللي العنها الله تعالى. <sup>30</sup> وعاش لامك بعد اخلاية نوح 595 سنة، واجبر فيها أولاد آخرين وامنات. <sup>31</sup> وكان عند لامك 777 سنة وقت وفاتو. <sup>32</sup> وإلين عاد عند نوح 500 سنة، اجبر سام وحام ويافت.